

修訂日期: 2006/04/12 發行日期: 2008/2/21

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 10, No. 290

原始資料: 蕭鎮國大德提供, 維習安大德提供之高麗藏 CD 經文, CBETA 自行掃描辨識

No. 290 [Nos. 278(26), 279(31), 289]

佛說較量一切佛刹功德經

西天譯經三藏朝散大夫試光祿卿明教大師臣法賢奉 詔譯

如是我聞。一時。佛在王舍城法野菩提道場。坐金剛摩尼寶師子之座。有菩薩摩訶薩眾。周匝圍繞。復有十佛刹百千俱胝那由他眾。聽佛說法。爾時會中有一菩薩摩訶薩。名不思議光王。即從座起。瞻視大會諸菩薩已。而白眾言。汝諸佛子。今當諦聽。此娑婆世界。滿一大劫較量時分。是彼西方極樂世界。無量壽佛刹一晝夜。佛子。彼極樂世界。一大劫較量時分。是阿彌陀沙世界。縛日囉(二合)娑誡囉鉢囉摩哩那曩如來佛刹一晝夜。佛子。彼阿彌陀沙世界。一大劫較量時分。是不退輪光明世界。敷蓮花身如來佛刹中一晝夜。佛子。彼不退輪光明世界。一大劫較量時分。是無塵世界。法王如來佛刹中一晝夜。佛子。彼無塵世界。一大劫較量時分。是燈光世界。師子如來佛刹中一晝夜。佛子。彼燈光世界。一大劫較量時分。是善光世界。毘盧遮那如來佛刹中一晝夜。佛子。彼善光世界。一大劫較量時分。是難勝世界。法敷身如來佛刹中一晝夜。佛子。彼難勝世界。一大劫較量時分。是謨賀世界。一切通意王如來佛刹中一晝夜。佛子。彼謨賀世界。一大劫較量時分。是現圓光世界。讚歎如來佛刹中一晝夜。佛子。如是一切世界。依劫算數過十佛刹百千俱胝那由他微塵數劫已。有世界名蓮花吉祥。彼佛世尊名賢吉祥。是彼佛刹中一晝夜。佛子。彼有菩薩地名普行地行。如是無量菩薩行。佛子。若復有人於此較量一切佛刹功德經。受持讀誦。為他解說。彼人命終。十方佛刹恒河沙數。諸佛如來。悉皆現前。滿彼有情一切所願。佛說此經已。不思議光王菩薩及諸大眾。聞佛所說。皆大歡喜信受奉行。

佛說較量一切佛刹功德經